

Il caschner/chischner

En general

A **Camischolas** e **Zarcuns** ein tut ils chischners svani. A **Camischolas** era ei 14, **Camischolas Sura** 6 ed a **Zarcuns** 8, total 28. Igl onn 1961 stevan aunc 12 chischners en **Tujetsch**, numnadameibn 5 a **Rueras/Dieni**, 4 a **Gonda/Salins** e 3 a **Sedrun**.

Construcziun

En **Tujetsch** fuva il chischner liber derasaus. Talinas deva ei mo fetg paucs ed enqualin chischner fermaus vid in baghetg. In chischner consista ord 2, 3 entochen 4 posts; drova 4, 6 entochen 8 ed aunc dapli areisens. Ils chischners cun mo dus posts numnav'ins geina. In chischner cun quater posts fuv'e aunc viagiu **Rueras**; in cun tschun posts existeva a **Tujetsch** mo sin **Gonda**; in cun sis haveva da gliez temps mo la venerabla claustra a **Cons** e fuva ina remarcablada.

Situaziun

Ils chischners eran sur e sut il vitg (**Camischolas**); tuts miravan sid. Il suffel dil **Cuolm da Vi**, quel era lu il stan da menar els.

Possess, dretg e servitut

A **Camischolas** eran certas servituts. Gliez sai jeu mai ch'ei ha dau historias pervia da quei. Nus vein l'idea ch'enteifer il termin da vegn onns hagien ins il dretg da puspei baghegiar si in chischner. Mai possedeva in pur in sulet chischner. Tier las parts da mintga pur retractava ei dalla part denter ils posts che vegneva numnada aiferpiest, ni d'in u plirs meters ladezia da dem entochen sum, numnau aunz, ni era mo la part agl ur dil chischner numnada tschetscha. Las parts dependevan dalla grondezia digl èr e buca dalla casa. Il dretg er'adina il medem. In ha la tschetscha ed in miez aiferpiest da maun dadora. In auter veva in aiferpeist senza la tschetscha. in chischner cun quater posts s'udeva a divers vischins. Actualmein havevan art e part: Giachen Lurenz cun in aiferpiest ed in aunz, Hans Gieri cun dus aunzs, Tumaisch Madlainer cun treis aunzs; la pli gronda part s'udeva denton agl aug Meltger, ... Ils chischners vegnan artai cul prau. La casa drova buca chischner!

Piest/posts

Quei che jeu serecordel vegneva la lenna dada dil bostger. Quei era lenna concedida per prezi reduciu. Ils posts dulavan ei giu. Sisum fagevan ei fuorma da tetg, giufuns eran ei rodunds. Tut ils posts vevan in crap suten. Entuorn la crappa mettevan ei nuot. ... Da far ora las ruosnas els posts, haveva Giusep in agen inschign. El fageva ora quellas tut mo cun la sigir aulta, strusch ch'el havess falliu zacu ina frida; en duas, treis minutus tagliav'el ora ina. Caduff luvrava cheu cun scalper e manera, ...

Ils posts = quei ein lenns gronds, liungs e gross, che tegnan agrad si il caschner. En quels vegn ei fatg en ruosnas naven da sisum tochen giu aschi in meter e miez. Biars caschners han treis ni quater posts. Ils caschners che han mo dus posts ein aschi dus meters in ord l'auter, quels ils quals han treis ni quater posts ein aschi in meter e miez in ord l'auter.

Lattas da canadél

Silmeins dus meters e miez munglass ei esser avon che las lattas vegnan. Las empremas lattas numnadas las lattas da canadél stattan sin duas clavellas en ruosnas da traders da darschuns.

Lattas

La regla po esser 18-20 lattas. ...Las lattas ston esser lenna tagliada, schiglioc targess ei en l'aua e smarschentass en buca ditg il lenn, ...

Las lattas = quei sto esser lenna tagliada, schiglioc tress ei en l'aua. En in dils gronds caschners eis ei schon aschi vegn lattas.

La tschetscha

... Ti savesses forsa serrar giu las tschetschas, ch'jeu hai pinau tier ier sera. La tschetscha ei numnadamein quella part, che varg' ora il piest da mintga vart e che vegn serrad'en dallas lattas.

La tgetgna/tschetscha = las lattas, che van atras las ruosnas dils posts vargan aunc ora empau

quels e quei numnan ins tgetgna. Las lattas vargan ora ils posts aschi miez meter.

Igl aiferpiest

In aiferpiest, ni in aifer, la part denter dus posts, ha quater aunzs, la tschetscha ei anzi pli pintga ch'in aunz.

Areisen (era areismen)

Per regla sis areisens, da mintga maun treis per in chischner da treis posts. Pli u meins ils buns areisens da maun sut. Da l'aura sut ei in chischner mai seders. Ils areisens ein per bia buca aschi gross sco ils posts. La vart grossa digl areisen vegn sil chischner perquei che leu stuev'ins far ora la bucca. La bucca stuev'esser ch'ella pudeva ella latta. Sisura era ei silmeins aunc ina, il bia denton duas ni treis lattas. Per regla van tut ils areisens sillla medema latta. La cua, la fin digl areisen, vegn messa en la tiara e fermada da mintga maun cun dus pals.

Ils areisens = quels ein fatgs per tener agradsi il caschner. Quei sto esser lenna grossa e liunga, era tagliar sto ins ella, schiglioc tila ei en l'aua e smarschescha pli dabot.



Giebel

Il giebel gebel = quei ei sisum il caschner grad sut il tetg en.

Il tetg

Il tetg da duas alas fatgs cun aissas buca splanadas da circa in meter, forsa strusch, ei sin lattas.

Talina

La talina = en biars loghens han ei il caschner vid il clavau e quel numnan ins talina. Ils funs talina = ei il funs dalla talina.

Far giu chischner

In chischner teneva per ordinari rodund 20 onns. Da derscher giu era ei malsegir. Il Vigeli Monn ei vegnius sut in chischner.

Derscher si, metter si chischner

*„Quels umens vegnan supplicai da vegnir per l'amur da Diu a derscher si il caschner giu las **Palius**. Ins vegn supplicaus da vegnir stedi, perquei ch'igl ei in grev da quater posts ed ha si tetg.“ ... Arrivai sil plaz, controlleschan zacons, schebein ei seigi avon maun sufficientamein aissas, cuortas e liungas, sco ei drova. ... „... nus essan cheu curonta e vein era tut gl'uorden ch'ei drova!“ ... Sper mintga post sepostan ussa dus umens, mintgin cun in palfier, per spuranaus ils posts ch'ei mondien buca suto. parta giu ulivamein las aissas sillla ladezia dil chischner. ... sesaulza il chischner per circa in meter ed otgonta or dalla tiara. ... Il chischner va puspei per circa in meter egl ault. „Uss en cullas aissas cuortas!“ grescha il commando e sin ses plaids omnipotents vegn il chischner ussa spuranaus da mintga vart dils posts encunter ina latta cun aissas da dus meters e miez entochen treis. Pli ad ault encunter il tetg tegnan 4 - 5 umens vid in'aissa spuranaus aunc aissas pli liungas da circa 4 meters, per saver stuschar, sin commando pli ault il chischner. ... Stend tut agrad eri, van circa la mesadad dils umens naven e vegnan neunavon cun aissas da 5 meters ed il chischner sesaulza puspei sin in recent commando. „Uss en cun ils areisens, mo gl'emprem mirei che las las aissas seigien bein sprunadas!“*

Plirs umens sedrovan da purtar neutier dus, treis areisens. Davontier vid il tgau, q.v.d. vid la bucca digl areisen tegnan dus, treis umens spuranau in'aissa ed aulzan cun quella igl areisen egl ault. Treis umens, in per areisen, van ussa tut alla bahutta dallas lattas dil chischner si, mintgin cun in terschiel e sepostan el liug nua ch'igl areisen vegn tschentaus en. Essend sin lur posts, vegn la cua digl areisen alzada mordio egl ault, per rabbitschar igl areisen ella latta. Quei reussescha oreifer, sco da metter igl effel ell'onza. Mo ussa vegn el aunc fermaus cun in terschiel per megliera segironza. Ils areisens ein bein fermai ed ussa seglian zacons umens neutier e catschan en mintgin da quels in punachel oragiudem; quei fan els per saver tschentar encounter quel in'aissa, sinaquei ch'ils umens sappien tschappar da stuschar. Ils areisens ein en e stattan en! La lavour prigulusa e principala ei fatga; mo aunc ina stuschada, speronza ina buca memia da vilau ed il chischner ei derschiis sidretg. ...

Ussa rest'ei mo aunc dad ira si culs auters areisens. ... Els cargan mintgin in areisen cul tgau sil schui, van d'ina scala si e suenter dallas lattas si sco stgirats, ferton che 4 - 5 umens han pigliau scadin dils areisens per la cua, dont suenter ton sco ei pon. ... Mo per tschentar en igl areisen culla bucca ella latta, ston ils umens vid la cua alzar quel dil ridischen egl ault. ... ils areisens ein lugai ed ussa vegn il chischner aunc mess schibein sco pusseivel el plumin.

Fontaunas

Scartira uiarscha:

Notizias da Gion Felici Monn

Texts citai ord "Suenter viasprias" da Guglielm Gadola, **Mustér**



Treis chischners a Sedrun